

# Skýrsla

um skólahald á Litla-Hrauni og í Bitru/Sogni skólaárið 2011 – 2012

Skólahald á haustönn á Litla-Hrauni og í Bitru var að mestu leyti með hefðbundnum hætti, nema hvað sk. „laus skólastofa“ var mætt á hlaðið í Bitru helgina áður en kennsla hófst þar. Hún var strax tekin í notkun og kenndu þrír kennarar, mánudags-, þriðjudags- og miðvikudagsmorgna þar í 80 mínútur sinn daginn hver.

Auk þess kom kennslustjóri einnig vikulega í Bitru og námsráðgjafi tvisvar í viku. Alls voru 13 nemendur skráðir í staðbundið nám þar, einn stundaði nám þaðan á Selfossi og annar í Tækniskólanum í Reykjavík, en báðir höfðu áður stundað nám við FSu á Litla-Hrauni.

Á Litla-Hrauni innrituðust alls 39 nemendur í eitthvert nám á vegum FSu.

Alls þreyttu 34 nemendur einhver próf í 30 áföngum, en í átta áföngum til viðbótar skilaði sér enginn til lokaprófs eða hafði ekki lokið öllum skylduverkefnum í viðkomandi símatsáfanga. Í flestum þeirra tilfella höfðu nemendur þá losnað úr gæsluvarðhaldi eða heyktust á algeru utanskólanámi.

Í fyrrgreindum 38 áföngum voru 276 námseiningar lagðar undir og skilaði rúmur þeirra sér í hús, eða samtals 156 einingar. Hátt í helming þeirra innbyrtu nemendur í Bitru, þótt þeir væru aðeins riflegur þriðjungur nemendahópsins.

Auk áðurnefndra 53 vistmanna, sem innrituðust í nám á vegum FSu á önninni, stunduðu sjö vistmanna fangelsanna tveggja háskólanám – ýmist við HA, HÍ eða HR – og nutu þar gjarnan fyrirgreiðslu Háskólafélags Suðurlands.

13. september féll skólahald á niður en þess í stað var nemendum á Litla-Hrauni boðið til afmælisfagnaðar í íþróttasal fangelsisins kl. 10:30 í tilefni af 30 ára afmæli FSu. Kennslustjóri hélt þar stutta tölu um starfsemina á liðnum áratugum. Í Bitru var afmælinu einnig fagnað eftir hádegi með sömu tölu, kaffi og kruðerí líkt og á Litla-Hrauni.

Í annarlok funduðu fangelsiskennarar með stjórnendum fangelsanna, stjórnendum FSu, námsráðgjafa og kennslustjóra fangelsanna að ógleymdum Erlendi S. Baldurssyni, deildarstjóra í Fangelsismálastofnun ríkisins. Fundað var í skólastofunni í Bitru. Var fundurinn talinn gagnlegur og ýmsar tillögur til úrbóta komu fram.

Í októberlok sótti kennslustjóri 13. ráðstefnu EPEA, sem að þessu sinni var haldin í Manchester. Í ráði er að 14. ráðstefnan, sem haldin verður árið 2013, verði haldin í Hveragerði, en hluti ráðstefnugesta kemur til með að gista á Selfossi.

Á vorönn 2012 hófst skólahaldið í báðum fangelsunum 9. janúar. Alls var 51 nemandi innritaður í nám á vegum FSu, einn stundaði fjarnám á vegum Promennt.is og sex voru í háskólanámi. Í annarlok bættist einn í nemendahópinn, en hann hafði stundað nám við Tækniskólann og tók nokkur próf þaðan fyrir milligöngu kennslustjórans á Litla-Hrauni. Eins og jafnan áður heltust allmargir úr lestinni áður en önninni lauk.

Um miðjan aprílmánuð fluttist sú starfsemi, sem verið hafði í Bitru, að Sogni í Ölfusi og var skólastofan þá líka flutt með. Vonir standa til, að þetta verði til að auka enn framboð á áföngum þar, en aðstaða þar er ágæt, til dæmis til að kenna matreiðslu.

Á Litla-Hrauni lögðu 29 FSu-nemar alls 194 einingar undir námsmat á önninni og stóðust 129 þeirra; þar af átti einn nemandi 27 eininganna.

Í Bitru og síðar í Sogni lögðu 9 nemendur 68 einingar undir og skiluðu 43 þeirra sér í hús. Alls voru því innbyrtar 172 einingar á vegum FSu á önninni í fangelsunum tveimur. Algengasta einkunnin á báðum stöðum - hjá þeim sem á annað borð skiluðu sér til prófs - var einkunnin 8.

Sjö kennarar auk kennslustjóra mættu reglulega á Litla-Hraun til kennslu og auk þess sinntu 11 kennarar fjarnámi þar. Staðbundinni kennslu í Bitru og síðar á Sogni sinntu þrjú kennarar auk kennslustjóra og þrjú aðrir sinntu fjarnámi þar. Anna Fríða Bjarnadóttir var áfram í fullu starfi sem námsráðgjafi í fangelsum landsins.

Að afloknu skólahaldi annarinnar funduðu fangelsiskennarar með stjórnendum fangelsanna, stjórnendum FSu, námsráðgjafa og kennslustjóra fangelsanna og Erlendi S. Baldurssyni. Fundað var í skólastofunni í Sogni. Fráfarandi skólameistari FSu, Örlygur Karlsson, kunngerði þar m.a., að starfshlutfall vegna kennslustjórnar í fangelsunum tveimur yrði nú hækkað úr 25% í 50% starf.

Stokkseyri, 24. maí 2012  
Ingis Ingason, kennslustjóri á Litla-Hrauni og í Sogni.